



partii naleraq

13.maj 2019

UPA2019/119

Kinguaassiuutitigut atornerluisoqarsimatillugu ilaqutariit eqqugaasut ataatsimoortillugit avissaartinnagit piffinni katsorsartittalernissaat anguniarlugu qanoq iliuseqartoqarsinnaanera pillugu inatsisartut oqallisiginissaannut siunnersuut.
(Inatsisartuni Siumup gruppiani ilaasortat)

Apeqquteqaat aallaavigalugu oqallinnissamut siunnersuut matumuuna saqqummiunneqartoq Partii Naleqqamiit oqaaseqarfigissavarput.

Inuiaqatigiinni kalaallini tullusimaarnartaqaaq ilaqutariippassuit ulluinnarni ingerlalluurtut ajunngilluinnartumillu inuuneqartut, minnerunngitsumik meeqqanut inuusuttunullu paarsilluurtut inuiaqatigiit akornanni takutsitsilluurtut maligassiuuisullu amerlasuut pigigatsigit.

Anaanat ataatat meeqqaminnik paarsilluurtut, aataakkuut aanaakkuut ittuklut ningiukkullu ernguttaminnik erngutaqqiutiminnillu paarsilluurtut, isigalugit tulluusimaartaqaat, qujanartaqaat ajornartorsiutit takkussinnaasaraluurtut uniffiginagit kinguaariinnik paarsilluurtarassi nersualaarpassi.

Kisiannili aamma ilaqarpugut ilaqutariit ajornartorsiuteqartut ilaatigut amerlaginarsinnaasartut, ilagut taakkua ajornartorsiuteqartut pisussaaffigaagut pitsaasumik inuuneqarnissaannut ikiussallugit. Meeqqanut inuusuttunullu akisussaaffeqarnerulluta minnerunngitsumillu aamma ilaqutariit ataatsimoortillugit ikiortariaqaratsigit.

Tassami ilagut ajornartorsiortut ikiortariaqavissut isiginnaaginnartutut illugit kingusinaarluta ilaatigullu kingusinaarujussuarluta ikiorniarsinnaangilagut, sukkanerusumik sullittariaqalerpagut pisariaqarpallu aningaasat amerlanerusut ikiorsiinermut atugassat nassarineqartariaqarput, inuillu ikiortissat amerlanerusut aamma atorfinitsinneqarlutik.

Kommunimmi kisimiillutik artorpaat, naak ilungersorlutik aamma namminneq suliniuteqaraluurtut ikiorsertariaqarput, Namminersorlutik oqartussat sassaartaartariaqarput sakkortunerusumik suliniutit ingerlareeraluurtut annertusarlugit oqaatsit kisimik naammangillat aningaasaliinerit sulisussallu amerlanerit ikiorsiuttariaqarput.

Inuiaqatigiinni ajornartorsiutit annertuut aqqusaartorlugit ilisimavagut, ilaatigullu aamma qanoq iliuseqarsinnaanerput tunulliuttut ittarparput, ilaatigut namminneq inuiaqatigiittullu ikiorserneqarnissarput immaqa sanngiinnertut sapersutut isigineqannginnissarput pinerullugu sapinnginnerarluta oqalulluta, ikiorseerusutullu itigartittarlugit.

Isorliunerusuni najugallit ilaatigut meeqqanik inersimasunillu atonerluisoqarsimatillugu sukkasuumik ikiorneqarsinnaasannginnerat assorujussuaq inuit eqqorneqarsimasut ilaquataasalu ajornartorsiutigisarlugu inuttullu ernumanarluinnartumik inuusarnertik oqaatigisarpaat.

Tassami illersorneqarsinnaanngilaq pinerliisimasoq ullut tamaasa aqqusinermi naapittassallugu pissutsit tamakku aamma pinerluttaalisitsisunik eqqumaffigineqarnerusarialerput. Meeqqanik innarliisimasut piaarnerpaamik tiguneqartassapput, imaanngitsoq aqqusinermi ullut tamaasa pinerlineqarsimasunik naapinneqarlutillu takuneqartassasut tamanna akuerineqarsinnaanngilaq.

Ilaatigut ikiugassagut tunulliuuttarlugit, tamanna aamma ilaatigut nalilersortariaqalerparput sapikkatsinnik ikiorneqaniarutta ilassisarniartigit, inuit pillugit, inuiaqatigut pillugit, minnerunngitsumillu meeqqat pillugit.

Nunatsinni kinguaassiutitigut pingaartumik meerartagut eqqarsaatigalugit akuersarneqarsinnaanngilaq taamak annertutigisumik ajornartorsiuteqaratta, ajoraluartumik tamanna aamma pissuteqarpoq ulluinnarni inuunerissaarnissaq tamatigut torersumik ingerlanneq ajoratsigu takutsitsisarnigullu pitsaavallaarneq ajorlutik.

Taamaattumik katsorsaanerme ilaqutariit suliniarfigineqarneranni ullumikkornit annerusumik ikkorfartuinissaq aallunnerusariaqalerparput, takusinnaavarpummi ullumikkut suliniutit tamakkiisumik sunniuteqarsimanngitsut.

Inatsisartut ataatsimiittarnerini tamatigut taakkua eqqartortuarpagut taavaa aperisariaqalerpugut suliniutit taakkartortuarneqartut sumiittunuku? sooruna sunniuteqanngitsutut ittuartut. Imaanngilaq suliniutit ajorigigit, kisianniliuna sooq annerusumik sunniuteqarsimaneq sunniuteqarnerlu ajortut, pappiaraannarni suliniutit allaqqarpat? Imaluunniit kommunit sulisussaqaarniarnermikkut artorsappat? Imaluunniit tamatta immikkut ingerlaniarsarigatta arritsuaqqamik suliniutit ingerlappat?

Ulluni kingullerni Tasilami pissutsit saqqummiussunneqartut takuagut ilaatigut assut ilungersunartorsiorfiusut. Isumaqarutta Tunumi pissutsit kisimik taamaattut uagutsinnut salloqqittassaagut. Nunarput tamaat ajornartorsiutit aamma allaaneruallaanngitsut atorpagut. Pissutsilli tamakku massakkut ataatsimoorfiginiartigit ilagut ilaqutariillu tamatta kalluaqqaneqarpugut, taamaattumik inunnut eqqugaasunut ikiorsiinissarput ullumikkornit sakkortunerusumik ingerlattariaqalerparput.

Partii Naleqqamiit ersarissumik oqaatigerusupparput aatsaat taamak ersaritigisumik ajornartorsiutit isumaginninnerup iluani ilungersunartut annertusiartuinnartutut immata. Aammalu peqqinnissaqarfimmi napparsimasunik kiffartuussiniarneq assut ilungersunartutut innuttaasunik nalilersorneqariartuinnarmat pissutsit ajortikkiartuinnartutut ittut isiginnaaginnarsinnaajunnaarpagut.

Taamaattumik suliassaqarfiit annertoorujussuit marluk ataatsimoortillugit Peqqinnissaqarfik Isumaginninnermullu Naalakkersuinikkut ingerlatsiffiusut immikkoortillugit Naalakkersuisulernissaat ilungersorluta kaammattuutigeqqipparput, meeqqammi ilungersunartorsortut isiginnaaginnarsinnaanngilagut. Aammalu peqqinnissaqarfimmi nakorsiarniartarneq ilungersunarsiartuinnartoq aallunneqartariaqalermata.

Inuttut ajornartorsiutigut annertuut pissuteqarput ilaatigut tarnikkut annertuumik erloqissuteqaratta, ulluinnarni inuuniarnikkut atukkagut pissutaanerpaallutik. Ineqarnermut akiliutit qaffakkiartuinnartut, meeqqanik sumginnaaneq annertusiartuinnartoq, sumiiffiit ilaanni suliffissaaleqinerit annertuut, ilaqutariit amerlavallaartut aningaasaqarnermi annikippallaamik inuuniutissaqartut, suliffissaaleqisunut ikiorsiissutit annikippallaarujussuurtut.

Ilami kisimiittuuguni ullunut 14-nut 800.00 ataallugit inuuniutissaqarput naak taava aatsaat taamak nunarput ingerlalluartigisoq. Sooruna aatsaat taamak ingerlalluartigigutta ilagut taamak ajornartorsiortigisut. Aperisariaqalerpugut taava aningaasat ingerlalluaatigut sumunuku torartut? Neriuppunga taanna Naalackersuisut akisinnaassagaat asuli tusaqquasaaginnaratik.

Imigassamik anngajaarniutinillu ajornartorsiuteqarpugut assut annertuumik, taakkualu kinguneri takunngitsuusaarpagut meerarpassuit inuusuttorpasuit ilaqutariippasuit avissaartuupput. Ilaqutariit inigisaminnik aniorartinneqarput, Ilami utoqqaat imminnut pilersorsinnaajumallutik avittartut takornartaajunnaariartuinnarput utoqqalinersiuteqarnermikkut ajornartorsiortarnertik pillugu. Taava naak tamanna aatsaat taamak ingerlalluartigilersugut aningaasarsiornikkut inuiaqatigiinni.

Imigassamik atuinitta kingorna sumiginnaanerit meeqqanik atonerluinerit annertoourujussuusut tamatta nassuerutigisariaqalerparput, nassuinngikkuttami ajornartorsiutit takunavianggilagut.

Qanga Ittoqqortoormiit komiti 2001-2003-mut nunaqavissut peqatigalugit suliniutit ingerlanneqarnikuupput assut iluatsilluartumik, kommuni Naalackersuisoqarfilla kaammattorniarpagut periuseq taanna atorlugu suliniutinik aaqqissuusseqqullugit tassani taamanikkut pissutsit aamma ilungersunartut suleqatigiilluarnikkut pitsaasup tungaanut annertuumik inuttaasunut alloriartitsinikuupput.

Ikiorserneqarnissarput avataaniit ammaffigisariaqarparput qallunaat folketingiata Naalackersuisuisalu oqaatigaat qallunaat piareersimapput isumaginninnikkut ikiorsiiniarlutik. Taava sooq itigartissavagut? Sooruna mittarfissuarnut ikiortigeriarlugit, allanullu tulluusimaarutigieriarlugit, ikiorneqartussat pingaarnarujussuit, inuit erloqisut, meeqqat sumiginnakkat, meeqqat atonerlunneqartut, ikiorneqarnissaat neqeroorutigineqarmat Naalackersuisugut qujaannarput.

Tassanilu ersarissorujussuarmik takuinnarsinnaavarput Mittarfissuit inunnik ajornartorsiortuninngaanniit pingaarnarutinneqartut. Inunnullu ajornartorsiortunut meeqqanut ikiortariaqartunut mitallernertut allaat taaneqarsinnaavoq. Ikiuerusuttunut naggaartuinnarata akuersaarniarta meeqqat inuusuttut utoqqaallu pillugit.

Taamatut saqqummiussaqluta oqallissaarummut saqqummiussaarpugut.

Hans Enoksen

.